



Rabu, 28 September 2022

**Ogen: Matius 7:21-23**



Ngelakoken Si Ngena Ate Bapa



**I** bas sada buku karangen Pdt. Andar Ismail, maka lit pigapiga tipe kalak Kristen. (1) Kristen verbal e me ia ieteh kalak Kristen erkiteken rusur ndarat arah babahna nari kata-kata kristiani e me syalom....puji Tuhan...Tuhan si masu-masu ya..Tuhan Jesus ras si debanna. Sengget pe ia terbelas kata Tuhan Jesus... kena nomor togelna terbelas kata puji Tuhan. Babah ras perbahanen la sendalanen. (2) Kristen ornamental e me ia ieteh Kristen erkiteken ornament-ornamen kristiani i bas rumahna tah bas kulana e me bura salib galang i bas kerahung, gambar Tuhan Jesus i bas rumahna, tulisen ayat-ayat Pustaka i bas rumah ntah i bas motorna, umpamana Tuhanku si ngaturkensa... tapi tupung bas dalam galang motorna e hampir siantuken kerina kalak banna erkiteken balapsa maba motor. (3) Kristen seremonial e me itandai ia Kristen erkiteken rajin pulung, tutus ku gereja, tutus ertoto tapi terjeng guna dirina ngenca janah labo mengubah biak ras karakterna. La terimplementasi ku bas kegeluhenna si tep-tep wari kai si ilakokenna e. (4) Kristen operasional e me ia itandai Kristen labo terjeng arah kinitekenna ngenca tapi arah perbahanenna i bas ndalanken kai si idatna i bas kinitekenna man Tuhan. La terjeng teoritis tapi praktis. La terjeng ngerana kerna Tuhan tapi ngelakoken kai si ngena ate Tuhan. Piahna arah perbahanenna termulia gelar Tuhan.

I bas ogenta pe isingetken Tuhan Jesus man banta maka kalak si erlebuh Tuhan...Tuhan bage pe pelawes setan-setan i bas gelar Tuhan, erbahan tanda sengget i bas gelar Tuhan tapi labo iperdiateken Tuhan. Engkai? Sabap babahna ngenca ertuhan labo kerina kegeluhenna. Si ngena ate Tuhan e me kalak singelakoken singena ate Dibata Bapa i Surga labo kalak sierlebuh-lebuh man baNa. Erkiniteken labo terjeng arah pigapiga dampar i bas kegeluhenta tapi arus totalitas kegeluhenta.